

Riep Baengzndaij

□ Vangz Vwnzcangh raiz Vangz Gyanghmyauz hoiz

Bunz riep baengzndaij daxdaiq daemj haenx, ce ndwi baenz ngeihcib lai bi. Mboengqgonq cingileix aen' gvih, mehyah yiemz de ciemq dieg, nyenghdingh yaek vut bae, gou gienq bae gienq dauq buenqngoenz, de cij nyienh louzce.

Bunz riep baengzndaij neix aeu naengndaij rag baenz sei nu baenz mae cij daemj baenz. De cocat, nanwt, bunz ndeu miz cib lai gaen naek. Aenvih de naekna, duenghrumrum, din riep cungj ndaej depgaenh seiqhenz mbonq, duznyungz hauejbae mbouj ndaej. Mae' ndaij geh iqmaetmaet, doeng rumz gig ndei, seizhwnqg duznyungz mbinnyaengnyaeng, hix mbouj roxninh daengz oemhwnqg mbaetheiq.

Mwh bohme h gou gietvaen, daxdaiq caenfwnqz daemj bunz riep baengzndaij neix guh buenxhaq. Bunz riep baengzndaij neix buenx bohme h baenz ciuhvunz, couh lumj gienh buhdiet nei, caih fagnaq baenzlawz nyingz cungj dwk mbouj byoengq, geij cib bi lumj ngoenz ndeu vaiqvut, couh baenzneix venj ndaej maenhmwd, coengzlaiz mbouj byoengq gvaq vaih gvaq, itcig daengz song bouxlaux gvaqseiq.

Doengh bi haenx, ndaw ranz miz bunz riep baengzndaij ndeu, caen dwg miznaj lai lo, roxnaeuz dwg cungj loqsiengj ndeu. Ndaeigeiq dwg bi 1987, gou boux dangzgo ndeu gietvaen, beixnangz riengz sing loxlez aendoih couxcin, loq mizdi najmong yamq ok aendou ranzmeh, byaij daengz byonghroen, caeuq gyoengqvunz couxcin gangjgoj, dingqdaengz dangzgo mbouj guh riep baengzndaij, de song diuz ga gyaengjgyat, ning mbouj ndaej lo. De naengh roengz gwnz namh bae, faj naj de laepnyamnyam, lij miz geij caek raemxda laelili. Vah van vah unq lox geij aen cung, caj daengz cienz daeuj aen siusik dangzgo cawx ndaej bunz riep baengzndaij venj hwnjdaej, beixnangz naj cij hai, fajnaj yungzyubub, ndwn hwnjdaej laebdaeb byaij bae. Yienzbonj dingh youq banhaet cib diemj cung baedauq baiqdangz, nyengh ngaiznyed daengz banringzgvaq sam diemj cung cij hainduj guh yizsiz, hawj gyoengq lwnyez dou nyouq dwk noh rangfwtdungx iekngaungau, caj dwk nanznwd myaiz rihraengraeng.

Daxdaiq gou dwg boux lauxhangz nu cagndaij. De sien dawz gij naengndaij naenx hauej ndaw ndaijngaz deihaenyaen haenx, menhmenh rag baez ndeu, diuz naengndaij saek lwgfwg song lwgfwngz gvangq haenx couh sikhaek bienqbaenz diuz seindaij saeqsetset. Mwh gwed naengndaij baihsuwx bienqbaenz baihgvaiz gwed mae' ndaij saeqset le, daxdaiq couh hainduj nu cagndaij ciep mae. De naengh youq gwnz daengqeiq iq, vid dinvaq daengz gagoek cei q dingj haenx sangvidvid, dinvaq caeuq gyauejhoq ndawde, couh baenz giz nu cagndaij. Sien dwg aeu seindaij nu baenz mae' ndaij, caiq aeu gizgyaeuj mae' ndaij caeuq mae' ndaij doxlien z hwnjdaej, baenz diuz mae raez, fwngzgvaz cuengq aen cuzbaenq ndeu, diuz mae' ndaij daj baihsuwx cie p gvaqdaej haenx gaeuq raez le, couh aeu fwngzgvaz bae cienq aen cuzbaenq haenx, hawj mae' ndaij menhmenh bienqbaenz ndaek mae hungloet ndeu.

Daxdaiq daeuj ranz dou nu cagndaij, bingzciengz dwg youq hanzgyaj caeuq sujgyaj. Hagdangz baez cuengqgyaj, daxboh couh heuh gou caeuq daeggo byaij cib geij leix roenbya, daengz ndaw luegbya bae coux daxdaiq daeuj, daengz

sougyaj haihag, cij soengq de ma daengz ndaw luegbya. Daxdaiq baez daengz, dou sim' angq raixcaix, aenvih daxdaiq youq ranz, gek song sam ngoenz, couh ndaej gwn lai ndei di. Aen sigij gonq bet goujcib nienzdaih, youq lajmbanj, bingzciengz gig noix ndaej gwn noh, siengj daih gwn daih ndoet, ciengzseiz yaek caj daengz ngoenzcieng ngoenzci et cijndaej gwn. Bat nohbiz dawz daengz gwnz daiz, cungj dwg ciuq gij gvigawj yiemzgek daxboh bae gwn, de mbouj hawj dou haj beixnuengx gag nip, deng caj de baez lwnz baez lwnz bae fat, haujlai lwnz de caeuq daxmeh cungj mbouj ndaej gwn saek gaiq, songde cungj bak gangj doxdoengz naeuz, dou bouxlaux aenndang gaenq dinghyiengh lo, gwn haeux imq couh ndaej, mbouj yungh gwn baenzlai noh, daxboh nip noh seiz, lij gig miz bouhloh, baezbaez cungj ciuq gonqlaeng daeuj, gaiq hung nip hawj daeggo, gaiq iq nip hawj daegnuengx, mwh ndaw bat lw doeklaeng sam sei q gaiq noh, couh dingz gouh dawh naeuz: "Faen mbouj doh lo, geij gaiq neix ce hawj daxdaiq donq laeng gwn, de geq lo, yaek bouj yingzyangj, sou miz maz yigen lwi?"

"Mbouj miz!" Dou haj beixnuengx caemh sing han, couh lumj hagseng hoizdap gij vwndiz lauxsae nei.

Caj daengz donq daihngaih, daxdaiq nyenghdingh yaek faen saek gaiq song gaiq noh hawj song daegnuengx dahnuengx cei q iq haenx, hoeng daxboh mbouj hawj, cij raen de naj laepbwt, caengzroemroem, naeuz, gou naeuz baenzlawz guh couh baenz de guh! Daxdaiq couh mbouj gamj gag guhcawj, daxboh simsoh hozgaenj, youq fuengzcug caeuq caencik ndawde okmingz lo.

Mizseiz nanz mbouj miz noh gwn, daxboh couh youq henz rongzgaeq baenqloekloek, danghnaeuz ra ndaej song aen gyaeq, de couh heuh daxmeh cien baenz aen, dandog cuengq hauej ndaw vanj daxdaiq; danghnaeuz lai miz saek aen song aen, de couh heuh daxmeh cien hawj song daegnuengx dahnuengx cei q iq haenx.

Song diuz gagoek daxdaiq aeu daeuj nu cagndaij haenx, haemhhaemh cungj yaek aeu raemxraeuj oep. Yiengh hong neix, daxboh couh heuh dou geij boux lwnyez bae guh. Daxboh naeuz, vahsug gangj "roega rox dauq ciengx bohme h, yiengzlw gvih gwn cij nyinh cingz", sou mbouj ndaej lien z roega caeuq duzyiengz cungj mbouj ha, ciuhvunz raeuz, yaek rox geiq cingz.

Daxdaiq daj lij iq couh cug din. Gou baenz gien baenz gien bang de geij diuz baengz cug din——cukcuk miz mij raez ndeu, mwh faj din iqetet de baij youq dangqnaj, dou roxninh geizheih dangqmaz; baihnaj fajdin, haj lwg din bingzbaiz doxcaenx ndaetndet, lwg dinmeh guhdaez, youq baihnaj soemswtswt, baenz faj din yawj hwnjdaej couh lumj gaeuyiengz iqetet. Din daxdaiq iqetet, nanzgvai q de byaij roen baenzneix numq. Doeklaeng gou naemj, daegdaengq baenzneix bae cang gya eu, aenvih mbouj dwg gij gya eu swyenz, couh mbouj suenq dwg yaeunde i lo!

Gou baez dem baez nyaenj gagoek、gahengh、angjdin daxdaiq…… Diuz gagoek de banngoenz aeu daeuj nu cagndaij haenx, fanzdwg gizdieg deng mae' ndaij ngad haenx, haujlai cungj mizdi ndaem aeu, gou oep mbaw sujbaq mbaeq ndat haenx youq gwnz de, gvaq geij miux cung youh fan baez ndeu. Daxdaiq ngeng ing aen daengqeiq, song faj fwngz



cuengq bingz youq gwnz gaiqbaengh daengqeiq haenx, song ngveih lwgda buenq hai buenq haep, bak lij damzbedbed. Yaep ndeu naeuz, ai, lanbengz, menh di; yaep ndeu youh naeuz, ai, lanbengz, mbaw sujbaq naenx haenq di……

Baenz ndaek baenz ndaek mae' ndaij cang rim geij aen loz le, daxdaiq couh hainduj baij ndei aendaemjbaengz. Bouxlawz hix ngeix mbouj daengz, bingzciengz daxdaiq aenvih nienzgeij laux guh hong menhmwd fwngz bamzbwd neix, daemjbaengz seiz, aenlwt cix vad bae riengjret vaiqvut. Mbouj miz vunz saenq, neix dwg gij dinfwngz bouxlaux caetcib lai bi ndeu. Dou yawj dwk dava bae, hoeng cix riengz mbouj hwnj fajfwngz de geq ok baezsoq.

Ciepdwk cix cawj baengz, gyaq aen rek hung ndeu, cuengq baengzndaij roengz ndaw rek hung bae, gya di mbawromj、mbawraeu oi q, nywj nyumx ngaiz, feiz iq menh cawj, song sam diemj cung youh dawz okdaeuj moeb baez ndeu, hawj baengzndaij menhmenh dawzsaek, bingzciengz yaek cawj song sam ngoenz, cij ok rek dak hawq, gij saek baengzndaij ciengxlwenx mbouj doiqsaek. Dak daengz saujsang, couh ndaej aeu daeuj nyib riep lo.

Daxdaiq daeuj ranz dou nu cagndaij daemj baengz, laebdaeb miz haj roek bi sujgyaj hanzgyaj, bibi dwg baenzneix yiengh. Seiznyez gou, buenxriengz daxdaiq nu cagndaij caeuq dingq gij gvigawj daxboh menhmenh majhung, menhmenh roxninh daengz gij vunz gij saeh ndawbiengz. Mwh gou baenz vunzhung ok rog bae guhhong le, baezbaez ngeix daengz doengh gij ndwenngoenz haenx, gij saeh hung saeh iq doenghbaez, hawj gou ndiepniemh nanz lumz. Cungj gamjcienz haenx miz haemzhoj siengsim gij saedceij doenghbaez, hix miz gij angqyangz vuenyungz mwhneix.